



**Ika-Unom nga Dominggo sa
Kasarangang Panahon
Pebrero 16, 2014**

**Ma-Dominggong Tamdanang Liturhikal alang sa Simbahan
sa Kabus sa Diwa sa Bag-ong Ebanghelisasyon**

Ang Simbahan sa Kabus, pinaagi sa Gagmayng Simbahanong Katilingban, Gitawag aron Ipatigbabaw ang Tawhanong Kagawasan Isip mga Pamaagi sa Ginoo diha sa Radikal nga Buhat sa Tawo.

Sa pagpadayon sa pamalandong bahin sa tanikala nga nagbugkos sa Simbahan sa Kabus ug sa Gagmayng Simbahanong Katilingban, ang PKP-II mihubit sa GSK, sa pag-ingon: **(138)** Sila maoy mga gagmayng katilingban sa mga Kristiyano, kasagaran mga banay nga nagpundok alirong sa Pulong sa Dios ug sa Eukaristiya. Kining mga katilingbana gihiusa sa ilang pari apan gialagaran sa mga laygo. Ang mga sakop managkaila gayud, ug ilang gisalohan dili lamang ang Pulong sa Dios ug ang Eukaristiya kondili uban usab ang mga butang materiyal ug kalagnon. Adunay silay halawom nga pagsabot sa panaghiusa ug sa ilang mga tulubagon ngadto sa tagsa-tagsa.

(139) Kasagaran migitib kini sila gikan sa mga ubos nga mga mag-uuma ug mga mamumuo, ang mga GSK nakahibalo sa ilang panlimbasog nga mahiusa ang ilang pagtoo ug ang ilang inadlaw-adlawng kinabuhi. Gigiyahan sila ug gidasig sa katesismong regular.

RITO SA PAGESUGOD

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Ug maanaa usab kanimo.*

Pasiuna ug Pag-abi-abi

P: Minahal Kong mga kaigsoonan: Niining adlaw, magpasalamat kita sa Dios tungod sa gasa sa tinuod nga

Ang kawad-on ug ang ilang pagtoo nagpasibot kanila sa halawom nga pagpakigduyog sa usa'g-usa, sa mga buhat sa hustisya ug alang sa buhing kasaulugan sa liturhiya.

Uban niining mga madasigong pulong sa PKP-II, maayo gyud kon pamalandongan nato ang atong gagmayng pundok sa pagtoo. Ato ba gayong nailhan ang atong identidad isip kabus nga mga mag-uuma ug mga mamumuo? Unsa may naghimo kanatong kabus ug biniyaan? Nagpundok ba kita isip banay sa mga gagmayng pundok sa pagtoo o simbahan? Unsay man nga mga tulumanon ang atong gilamid alang sa tingusbawan sa atong pagtoo ug kinabuhi alang sa atong mga kabataan ug mga batan-on, sa mga batan-ong hamtong ug mga hamtong ug mga tigulang na gayud? Nakaligid ba kitag programa sa katesismo nga naggiya sa atong pagtoo ug kinabuhi gikan sa sabakan hangtud sa lubnganan? Dinasi sa Batikano II sa iyang pag-ila sa Simbahan taliwala sa modernong kalibutan, ug isip Simbahan sa Kabus, unsa mang mga adbokasyaha ug programaha ang ania sa atong GSK alang sa hustisya ug panaghiusa nga nagapunting ngadto sa Gingharian sa Dios? ■

kagawasan, dili isip usa ka pagpili ug usa ka butang diha sa daghan kondili usa ka mahigugmaong pagtahan sa atong kaugalingon sa mga pamaagi sa Dios. Gitawag kita sa pagpadayag niining mahigugmaong pagtahan sa kaugalingon pinaagi sa pagka-radikal sa atong hunahuna ug mga buhat aron mabag-o ang kalibutan subay sa desinyo nga puno sa grasya sa Ginoo.

Akto sa Paghinulsol

P: Mga igsoon, hangyoon nato karon ang Ginoo aron kita pasayloon sa atong mga sala, kay ang atong Ginoo Dios sa gugma ug kaaghop. Nagakompisal ako sa Dios...

K: Sa Dios makagagahum sa tanan... nga inyo unta akong iampo sa Ginoo nga atong Dios.

P: Kaloy-an unta kita sa Dios nga makagagahum sa tanan.. sa kinabuhing walay katapusan.

K: Amen.

P: Ginoo, kaloy-i kami.

K: Ginoo, kaloy-i kami.

P: Kristo, kaloy-i kami.

K: Kristo, kaloy-i kami.

P: Ginoo, kaloy-i kami.

K: Ginoo, kaloy-i kami.

Himaya sa Dios didto sa langit...

Kolekta

P: Mag-ampo kita: O Dios, nga nagatudlo ka kanamo nga ikaw nagapuyo diha sa mga kasingkasing nga matarung ug matinud-anon, ihatag nga kami mahulma sa imong grasya aron mahimo kaming puluy-anan nga makapahimuot kanimo. Pinaagi ni Jesukristo imong Anak, nga buhi ug hari uban kanimo diha sa kahiusahan sa Espiritu Santo, Dios nga usa hangtud sa kahangturan.

K: Amen.

LITURHIYA NG SALITA

Unang Pagbasa: Sir 15,15-20

L: Ang pagbasa gikan sa basahon ni Sirac... (*Pagabasahon gikan sa Kasulatan*)

L: Ang pulong sa Ginoo.

K: Salamat sa Dios.

Komentaryo sa Sir 15,15-20:

Usa kini ka matahom nga pagpadayag sa personal nga kagawasan sa tawo isip batakang paghukom nga moral diha sa pagpili sa maayo ug sa dautan, tali sa kinabuhi ug kamatayon. Ang maayo nahilambigit sa kinabuhi; ang dautan, sa kamatayon. Ang kinaadman sa Dios modulot sa matag binuhat, apan nagtahod kini sa mga paghukom sa matag-usa. Bisan tuod midapig ang Ginoo sa tawo nga nahigugma Kaniya ug gisabot Niya ang mga panginahanglanon niini, dili gihapon Niya siya pagasad-on ni pagadauton. Iya sa tawo ang paghukom; busa, ang kasal-anan, ang kadautan ug kamatayon wala maggikan sa Dios.

Salmo Responsoryo: Sal 119,1-2.4-5.17-18.33-34

Tugon: Bulahan sila nga misunod sa balaod sa Ginoo!

L: Bulahan sila nga naglakaw nga dili mabasol, nga nagalakaw sa balaod sa Ginoo. Bulahan sila nga mituman sa mga iyang dekreto, nga nagpangita kaniya sa tibuok kasingkasing.

T: Bulahan sila nga misunod sa balaod sa Ginoo!

L: Imong gimando nga ang imong mga presepto pagatumanon gayod nga makanunayon. O hinaut pa unta nga magmalig-on ako sa mga dalan sa pagtuman sa imong mga balaodnon.

T: Bulahan sila nga misunod sa balaod sa Ginoo!

L: Pagminaayo nganhi sa imong sulugoon, aron ako mabuhi ug

motuman sa imong mga pulong.
Ablihi ang akong mga mata, aron
akong makit-an ang mga katingalahan
sa imong balaod.

**T: *Bulahan sila nga misunod sa
balaod sa Ginoo!***

L: Pahimangnoi ako, O Ginoo,
sa mga pamaagi sa imong mga
pamalaod, aron ako gayud silang
tumanon nga tim-os. Ihatag kanako
ang katakus sa pag-aninaw, aron
akong buhaton ug tipigan kini sila sa
tibook kong kasingkasing.

**T: *Bulahan sila nga misunod sa
balaod sa Ginoo!***

Komentaryo sa Sal 119:

Lain na usab kini nga salmo
akrostiko o alpabeto. Aduna kiniy
22 ka mga hut-ong nga giapilan sa
8 ka mga berso; ang unang letra sa
unang pulong sa walo ka berso sa
matag hut-ong nagasubay man usab
sumala sa mga han-ay sa 22 ka mga
letrang hebraiko. Ang 7 simbolo sa
pagkatibook; kon himoon kining 8,
buot ipasabot: tibook nga kahingpitan.
Ang mga berso nagayagyag bahin
sa Balaod sa Ginoo: sa konteksto sa
tibook salmo (7+1=8 sulod sa 22 ka
hut-ong), ang literaryong pagyagyag
sa tanang kasinatian sa tawo tibook
gayud nga gihalad sa paghigugma
sa Balaod sa Dios. Aduna pa bay
mas molabaw pa kay sa paghigugma
sa Dios sa Balaod? Mao bitaw nga
kining mga berso nagpangita sa
Balaod sa Dios.

Ikaduhang Pagbasa: 1 Kor 2,6-10

L: Ang pagbasa gikan sa unang sulat
ni Apostol San Pablo sa mga taga-
Korinto... (*Pagabasahon gikan sa
Kasulatan*)

L: Ang pulong sa Ginoo.

K: *Salamat sa Dios.*

Komentaryo sa 1 Kor 2,6-10:

Gihatagan ug dakong pagtagad ni
Pablo ang papel sa Espiritu Santo
sa Gilansang sa Krus mahitungod
sa gipadayag nga kinaadmang mas
labaw pa kay sa kinaadman sa
kalibutan. Kining labawng kinaadman
matugkad lamang sa usa ka hamtong
nga nagatubo sa mga katuigan sa
bag-o ug walay katapusang panahon,
ug dili sa mga anak nga nagatubo sa
mga katuigan niining lumalabay nga
kalibutan. Dili nato masabtan ang
mga pamaagi sa Ginoo pinaagi sa
mga sukod ug bili sa kalibutan; diha
lamang sa atong pagkamasinugtanon
sa Espiritu sa Gilansang sa Krus atong
masuhid ang giladmon sa kasingkasing
sa Ginoo ug mahibaw-an nato unsa
kalahi ug kalabaw ang Iyang mga
pamaagi!

Ebanghelyo: Mat 5:17-37

L: Ang Ginoo maanaa kaninyo.

K: *Maanaa usab kanimo.*

P: Ang pagbasa gikan sa Ebanghelyo
ni San Mateo.

K: *Himayaon Ikaw, O Ginoo.*

P: (*Pagabasahon gikan sa Kasulatan*)

P: Ang Ebanghelyo sa Ginoo.

K: *Daygon Ikaw, O Cristo.*

Komentaryo sa Mat 5:17-37:

Ang pagpadayag ni Mateo sa
pagsangyaw ni Jesus didto sa bungtod,
nga nag-angkon sa kahingpitan sa
Balaod ug sa mga Propeta ug nagtudlo
nga may awtoridad, nagpakita nga
si Jesus maoy Bugtong Magtutudlo,
ug wala nay lain. Mas labaw pa siya
kang Moises, ang pinakabanggiitang
magtutudlo ug propeta sa Karaang
Kasabutan. Nagatudlo siya tadlas
sa titik sa balaod padulong didto sa
uyukan sa balaod. Niining panahona,
nagatudlo siya sulod sa konteksto sa
bag-ong Gingharian sa Langit nga mao

ang kahingpitan sa mga kalibutanong ginghariang nasinati sa Israel ug ubang kanasuran. Si Jesus ang Magtutudlo nagagiya kanato padulong sa gamut sa balaod ug sa iyang kinatumyang tumong: pag-alagad sa kinabuhi, hustisya, gugma ug kamatuoran. Niining paagiha mabuntog nato ang kabalaan ug kamatarung sa mga eskriba ug mga Pariseo. Mahimo lamang kini pinaagi sa mga buhat nga radikal nga mobag-o sa daang mga balaod ug mogun-ob sa mga estruktura ug sinugdanan sa pamalaodnon sa kalibutan. Ang karaang balaod man gud ningkompromiso sa kahuyang tawhanon. Gi-implementar kini uban sa korupsiyon ug kabangis. Niining panglantawa, si Jesus mitudlo ug pagbalintuwang sa basihan sa daang balaod. Ug ang radikal nga basihan niining subersyon mao ang iyang balaang pagtamud sa kasingkasing, sa uyukan sa pagkatawo. Gipanghimaraot ug gisalikway niini ang tanan nga, sa takuban sa legalismo, sa tinuod pa nagyatak sa lintunganay nga dignidad sa tawo. Kini nga subersyon alang man sa Gingharian sa Ginoo!

Gihingpit ni Jesus ang balaod gikan sa uyukan niini, nga ang gugma mas gamhanan kay sa mga balaod.

Wali: Ang Simbahan sa Kabus, pinaagi sa Gagmayng Simbahanong Katilingban, Gitawag aron Ipatigbabaw ang Tawhanong Kagawasan Isip mga Pamaagi sa Ginoo diha sa Radikal nga Buhat sa Tawo.

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
Ang Simbahan sa Kabus, pinaagi sa Gagmayng Simbahanong Katilingban, Gitawag aron Ipatigbabaw ang Tawhanong Kagawasan Isip mga Pamaagi sa Ginoo diha sa Radikal nga Buhat sa Tawo.	Unsa may hinungdan sa pag-in-usara ug ka-libog sa mga batan-on? Unsa may hinungdan sa mga sakit sa inyong katilingban? Unsa may hinungdan sa kalagot ug pagkabahin-bahin sa inyong katilingbanong relasyon? Unsa may imong gihimo alang niini?	Gihingpit ni Jesus ang balaod gikan sa uyukan niini, nga ang gugma mas gamhanan kay sa mga balaod. Ang atong tinuod nga kagawasan anaa sa pagsunod kang Jesus ug pagtubag sa gamut-hinungdan sa tawhanong suliran!

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhar sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (Moyukbo ang tanan) ug natawo gikan ni Maria nga Ulay. Nag-antos Siya sa sugo ni Poncio

U bani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.



Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga hinigugma kong mga igsoon, hangyoon nato karon ang atong Amahan nga tabangan kita niya sa pagsunod kang Jesus pinaagi sa pagpili sa mga pamaagi sa gugma sa iyang gamut-hinungdan gayod. Ug motubag kita:

T: *Ginoo, dungga ang among pagpangayo sa gugmang radikal.*

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang paghatag ug saksi sa tinuod nga gugma nga nagasubay sa pagtulun-an ni Jesus, ug dili ang inulipon nga pagsunod sa mga di-makatarunganong balaod sa kalibutan. Mag-ampo kita sa Ginoo.

T: *Ginoo, dungga ang among pagpangayo sa gugmang radikal.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ilang ipadayon ang pagpatigbabaw sa misyong propetiko sa pagsangyaw sa alternatibong pamaagi sa Gingharian sa Langit. Mag-ampo kita sa Ginoo.

T: *Ginoo, dungga ang among pagpangayo sa gugmang radikal.*

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang panalipdan and kagawasan sa tanan nga mobuhat ug maayo dapig sa integridad ug kinabuhi, ug dili sa kangil-ad nga dapig sa korupsiyon ug kamatayon. Mag-ampo kita sa Ginoo.

T: *Ginoo, dungga ang among pagpangayo sa gugmang radikal.*

L: Alang sa mga batan-on nga nag-inusara ug naglibog sa panahon sa teknolohiya sa impormasyon ug sosyal media, alang sa mga masakiton ug mga himalatyon nga gihikiwan nga maangkon ang medisina ug pag-amoma sa panglawas tungod sa kawad-on ug kamahal sa mga kahimanang medikal ug sa mga nangasuko ug gigun-ob sa kalisdanan sa kinabuhi, nga molihok unta sila sa positibong paagi alang sa radikal nga kausaban sa kahimtang sa katawhan. Mag-ampo kita sa Ginoo.

T: *Ginoo, dungga ang among pagpangayo sa gugmang radikal.*

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: *Ginoo, dungga ang among pagpangayo sa gugmang radikal.*

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: *Ginoo, dungga ang among pagpangayo sa gugmang radikal.*

P: Ginoo ug among Dios, ang imong pagka-radikal nagpadayag sa kahingpit sa imong gugma ug balaod. Dawata kining mga pag-ampo nga among gihalad kanimo karon, ug dad-a kami nganha sa kabalaan ug kahingpitan

sa imong pagka-radikal. Kini among gipangayo pinaagi ni Kristo atong Ginoo.

T: Amen.

LITURHIYA NG EUKARISTIYA

Pag-ampo Alang sa Mga Halad

P: Hinaut Ginoo nga kining among sakripisyo, among giampo O Dios, maglimpyo ug magbag-o kanamo ug alang kanilang mituman sa imong pagbuot mahimo unta kining tinubdan sa ganting walay katapusan.

K: Amen.

Pag-ampo sa Eukaristiya

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo...

P: ‘Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang magapaabot kami nga malaumon sa pagbalik ni JesuCristo, among manunubos.

K: Kay imo man ang gingharian ug ang gahom, ug ang himaya hangtod sa kahangturan.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Pag-ampo Human sa Pangalawat

P: Mag-ampo kita: Human mo pakan-a niining langitnong pagkaon, naga-ampo kami, O Ginoo, nga amo unta kanunay pangandoyon kining kalan-on nga makahatag kanamo’g tinuod nga kinabuhi. Pinaagi ni Kristo among Ginoo.

K: Amen.

Katapusang Bendisyon

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa atong Dios: Hinaut nga ang kalinaw sa Dios, nga lapas pa sa tanang kahibalo, motipig sa inyong mga kasingkasing ug hunahuna diha sa kahibalo ug gugma sa Dios, ug sa iyang Anak, ang atong Ginoon Jesukristo.

K: Amen.

P: Ug bendisyonan unta kamo sa atong labawng makagagahum nga Dios Amahan, ug Anak ug Espiritu Santo.

K: Amen.

P: Panglakaw kamo sa kalinaw, ug himaya ang Dios pinaagi sa inyong kinabuhi.

K: Salamat sa Dios. ■